

石屏詩集

五



四部叢刊續編

石屏詩集

(一〇二一八)

翻刻必究

中華民國二十三年三月初版

本書實價國幣叁元柒角

外埠酌加運費匯費

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

石屏詩集卷第九

附錄

戴東塾詩

東塾諱昂字景明宋嘉定己卯應舉登第授顛州法曹參軍有東塾農歌

世集行

莫悲秋

傷春非貞女悲秋非烈士時運自循環我心如止水
剝固復之機榮乃悴之始未識天地妙胡為浪
悲喜鷓蓬或數仞鵬海或萬里大小何必齊蒙莊
未窮理



次黃叔絜茶隱倡酬之什

美人隱於茶性與茶不異苦澁知餘甘淡薄見真
嗜肯隨世俱昏寧墮衆所棄靈雨滋山腴迅雷起
龍睡草野未敢花春芽早呈瑞鬪水湏占一焙火
不落二趣深同誰叅雋永時自試葱姜勿容潤瓜
蘆定非類標名寓玄思微吟寫清致成我君子交
從彼俗客恚嚼芳懃泉石包貢免郵置遼遼玉川
翁千載共風味

雜言

衆芳以春榮萬葉以秋肅造物持其權兒戲恣翻
覆亭亭山上松蕭蕭澗邊竹超然榮肅中正色閱
寒燠

提壺勸我飲布谷催我耕我酒餅已罄我田草正
生荷鋤理荒穢及時新雨晴秋來刈吾秫庶得兩
遂情

逸翻凌丹霄潛鱗縱深壑天分安所適翔泳同一
樂短吟五七字薄酒三四酌浩氣與春風相從滿
寥廓

侍屏翁遊屏山分得水字

携琴入空山脩竹翠相倚一曲千古心泠泠寄流
水拂雲卧白石冥搜契玄理有時采薪人歌聲隔
林起

秋日過屏山庵

淒切抱葉蟬間關棲樹禽入山本避喧復愛聆此
音微颺動夕爽薄雲散秋陰衆籟闐以靜片月生
東林

山泉清且甘漱之冷侵骨拂苔坐石上松風更蕭

恣悠悠行空雲何心自出沒六鑿忽玲瓏吾計良
未失

夏肯甫曉山亭

開櫺納晨光隱几挹寒翠以我胸中真會彼景外
意孰因夜息存孰使晝枯累念慮方清明體認貴
切至峩峩成九仞進進基一簣勗哉亭中人涵養
玉其粹卷書意何如顏回坐忘地

春日偕兄弟侍屏翁遊晉原分得外字因集
句而成

春兩晴亦佳

杜甫

適與賞心會

高適

初日照高林

常建幽

泥化輕塏

韓愈

步屣隨春風

杜甫

始覺天宇大

劉禹錫

牽

懷到空山

韓愈

逍遙白雲外

孟浩然

青松夾路生

陶潛童

童狀車盖

杜甫

清川帶華薄

劉慎

陰壑生虛籟

杜甫

性達

形迹忘

韓愈

傲然脫冠帶

馬融

薄暮方來歸

范夢龍

月

光搖淺瀨

柳宗元

唐李涉有山中五無可奈何詩戲用其體作

秋日四章

無柰秋風何怒號震林木
益看我井上桐一夜失寒

綠莫作搖落悲妙理在觀復

無奈秋月何鍊魄金氣精炯炯一輪滿天地水壺
清照我方寸景表裏同光明

無奈秋山何萬疊淺深碧起來樓上看朝爽浮几
席稜稜政自高更養靜壽德

無奈秋水何悠悠盪輕槩上下天一碧顛倒涵萬
象愿從雙白鷗生涯寄浩蕩

孤桐行

孤桐結根倚崖石俯瞰清溪照虛碧枝葉扶疎未

夏寒上有翔鸞舊棲迹風霜冉冉歲月深老柯半
朽蒼皮蝕其中素抱金玉聲以暗投人人不識人
不識多苦心樵夫斤斧莫相尋寧教枯死倒澗壑
不從爨下求知音

逐瘡鬼

咄哉瘡鬼何冥愚沉魄猶滯江流居孰云胄出高
陽氏而乃不肖如此歟為妖常闖秋令動作威又
竊炎官餘今年恣睢逞暴害十戶九室聞嗟吁人
生一歲一寒暑自有大瘡纏其軀翻手為涼覆手

暖笑爾禍福纔須臾癡兒騃女或汝怖那能嚇我
烈丈夫汝不記少陵詩句有神語子璋髑髏血摸
糊昌黎譴逐更多術灌毒炷艾揮靈符今來古往
共憎疾柰何長惡終不渝胡不學鮫人細織外綃
製雲裾胡不從湘君緩移桂擢搴芙蕖乃甘卑滌
賈衆怨厭穰唾罵無時無爾來經旬瞰吾室再三
謝遣猶踈踈吾詩吾酒既不廢汝窮汝技將何如
大江秋色正瀟灑明月皎皎風踈踈便須悟悔遠
歸去嘯嘯呼侶相嬉娛夜闌吟徹欲就睡燈花照

石屏卷九
眼團如珠夢回病思若然散颯颯風籟生庭梧

書初考

得考雖多幸無功祇自嫌但求官速滿不道老同添
卑拙翺蓬鷄艱辛上竹鮎黃花寒更好三嗅憶陶潛
辛亥九日被檄視滂遂爽同官飲菊之約夜
宿荒驛風雨達曙

孤負重陽菊愁懷不肯寬郵亭一夜兩客枕五更寒
脚健從渠老心低到處安獨行誰可語時把古詩看

納涼即事

炎蒸欣傍晚掃地坐寬涼入竹風逾冷生荷水亦
香蟻行綠食几螢照落書床聽得農人語今年稻
穗長

侍屏翁領客遊雪山分得生字

雪峯峯頂寺來此定詩盟山瀑分雲影松風亂雨
聲眼明春樹綠心惺曉鐘清未好言歸去塵中事
又生

偕兄侍屏翁探梅屏山分得空字

踏破登山屐來尋傍水叢眼明千樹底春在數花

中格瘦詩難寫香寒酒易空
狂歌歸秉燭驚恠走
兒童

豈潛弟平遠圖

卜築占寬閒脩篁老樹間
八窓開宇宙一室貯雲
山野曠行人少天遙去鳥還
悠然會心處妙語徹
玄關

謝趙山臺見訪

寂寞海東頭殷勤貴客舟
如何經歲約祇作數宵
留清玩分行篔簹高吟壓小樓
更須謀再會同醉菊

花秋

臆前見蘭花

蘭叢纔一幹，獨向臆前開。
托蔭偏宜竹，先春不讓梅。
韻從幽處見，香自靜中來。
便欲紉芳佩，靈均喚不回。

安居

安居元自好，春晝更遲遲。
雪涌煎茶鼎，雲生浴硯池。
栽荷填廢沼，移竹補疎籬。
猶有閑光景，歌賦眠續舊詩。

次韻屏翁詠梅

芳信基花事東君思亦竒
橫枝踈蓓蕾半樹老丰
姿心共寒霜苦香惟夜月知
最憐清夢覺踈影竹
窻時

次韻屏翁觀梅

曉寒籬落外一見一番新
喚覺群芳夢先鍾萬古
春冷香宜醉寢真色任煙隣
更喜連朝雪飛花為
辟塵

項宜父涉趣園

四面山迴合中間百畝畦入門惟見竹遶屋半栽
梅果熟霜前樹魚肥雨後溪秋來饒景物斟酌費
詩材

小酌會芳分得陰字

暇日頻相顧清風舊竹林功名春後夢吟咏老來
心世事随流水年芳付綠陰悠然千古意閑理斷
紋琴

玉峯登眺得初字

玉峯竒絕處短策步崎嶇海近潮聲壯山空樹影

踈吟情危眺外飲興薄寒初數點新來鴈高飛不羨渠

小樓扁山海圖鄭安道酒邊有詩因次韻

等閑成小集危眺豁幽情四面畫圖出一襟天地
清晚雲山掩靄夜月海空明自有茲樓景輸君第
一評

次韻屏翁新秋

檢點新秋事天公賜已豐秋床梧葉兩曉袂竹林
風閱世心先老傷時酒易中誰將和戰議細與問

元戎

己亥十月晦大雷雨

舛令頻年見憂時百慮灰
入冬常苦雨昨夜又轟
雷土爛麥難種虫傷菜
失栽兒童不解事喜報海
棠開

次韻屏翁冬日

曉起衝寒出霜明日未晞
麥豐來歲本梅漏早春
機水涸魚深隱蜜成蜂
倦飛靜中參物理一一見
精微

自武林還家道由剡中

一筇雙不借，後役又東還。
野渡淺深水，夕陽高下山。
光陰虛我老，造物靳人閒。
高躅思吾祖，鳴琴獨閉關。

次韻屏翁新元聚拜

履端來聚拜，和氣洽昌辰。
蕃衍如今日，栽培豈一人。
詩書延澤潤，忠厚續長春。
相祝無多語，年新德又新。

次韻君玉弟春事

海棠紅未了又近牡丹時送日多忙事疇春欠好
詩暖風催麥早晴晷轉蒼蓬不盡清遊興重爲上
巳期

次韻晚春二首

一襟塵欲滿刮眼得新詩風絮遺春恨烟花隔歲
期筍抽虫半蝕櫻熟鳥先窺光景渾如此心閑即
好時

田園深有趣已分隱柴高老去情多感春來夢少
靈游絲捲晴日飛絮入空庭預識今年好啼鶻枕

上聽

春晚即事

春郊農務急野岸水痕高蒲渚鳴姑惡桑林轉百
勞整欄扶芍藥牽網護櫻桃不改窮居樂何妨見
二毛

次韻屏翁初夏會芳小集

一觴還一詠竟日醉難成坐石驚雲濕臨池愛水
平密林宜午蔭啼鳥尚春聲更有櫻桃約明朝且
願晴

夏初郊行

晴雨天難測寒暄氣未齊連村多綠樹終日轉黃
鸝田水衝塍斷山雲着地低偶隨農叟語不覺過
橋西

僻居

地僻塵囂遠身閒趣味深清池涵竹色老樹帶藤
陰引鶴隨閑步招蟬伴醉吟有時燃古鼎隱几自
觀心

亦龍第覆篔累石作亭其陰屏翁名曰野亭

索詩謾賦二首

幽棲得真趣，隙地巧經營。花竹有和氣，林園無俗情。帶經休樹影，抱甕俯池清。我亦甘肥遯，相從樂此生。

高懷抗塵外，林杪着三間。綠遶村邊樹，青浮海上山。目窮天變化，心靜地寬閑。鷗鳥知人樂，忘機亦往還。

秋晚

西風澄曉氣，凝觀愜幽情。草潤蛩聲滑，松涼鶴夢

清吟懷依水靜病思得秋輕
忽憶登高近循籬看
菊英

屏翁領諸孫小集亦龍弟野亭君玉即席有
詩次韻

結屋新亭好登臨雅興長
心融八窓白塵隔九衢
黃泛菊金英碎嘗粳玉顆香
更期梅着蕊來賞小
春光

鄭安道終歲相聚臨別以詩見貽次韻爲謝
解把詩言別那無計可留梅花兩心事寒鴈五更

愁我亦高懸榻君須獨卧樓後回相憶處莫返雪
中舟

夏曼卿作新樓扁曰瀟湘片景來求拙畫且

索詩

有此一樓足悠然萬慮忘拓開風月地壓斷水雲
鄉四野留春色千峯明夕陽眼前無限景何處認
瀟湘

金陵懷古

尚聞深巷語烏衣無復高臺彩鳳儀棟宇半欹元

帝廟香煙爭奉誌公祠六朝興廢千年夢獨客登
臨萬感悲莫上鍾山望淮北西風禾黍更離離

幽棲

幽棲頗喜隔囂喧無客柴門盡日關汲水灌花私
雨露臨池疊石幻溪山四時有景常能好一世無
人放得閑清坐小亭觀衆妙數聲黃鳥綠陰間

此生

此生畢竟已蹉跎有酒何妨醉且歌人世盡緣愁
得老春花偏被雨相魔草欺蘭瘦能香否杏花笑梅

殘柰俗何試上東樓看春景海山無數列青螺

自况

多貲徒作守錢奴伏臘無憂便有餘世路本夷休
自險人情太密反成踈非圖報施方為善豈為功
名始讀書門外良田堪種秫自牽黃犢試犁鉏

書房

書房清曉焚香坐轉覺幽棲趣味真恠石一根雲
態度早梅半樹雪精神池魚自樂誰知我林鳥相
忘不避人得喪由來天自定莫將閑慮惱閑身

移古梅植于貯清之側已有生意喜而賦之
剥盡皮毛真實在幾年孤立小溪得入來人去誰
青眼花落花開自苦心不是野夫同臭味難教君
子出山林巡簷日日窺生意一朵先春直萬金

再得古梅小而益恠首蒙屏翁品題因次韻
愛渠恠恠復竒竒冒雪遙憑健步移竹外池邊栽
恰好山巔水際夢多時百年死質餘生意一片孤
槎帶好枝寄語花神勤守護品題莫負老僊詩

初遊方巖山

圖志舊嘗看紀載杖藜今得徧經行漁翁化石幾
年釣仙客有田何世耕千尺枯崖蛻龍骨一簾飛
瀑撼雷聲相傳逸少曾來此惜不鐫巖記姓名

觀敗碁者戲作

看人出着笑人低及至當枰却自迷角子僅全輸
了腹東邊繞活喪於西欲裝劫去多難補待算征
來恰又提天下未應無妙手勸君莫愛墨後視

牡丹

萬巧千竒費剪裁瓊瑤錦綉簇成堆世間妖女輪

回魄天上仙姬降謫胎笑臉倚風嬌欲語醉顏酣
日困難擗東君若使先春放羞殺群花不敢開

喜有秋

去年已作填溝計誰料今年見有秋天意乘除元
自定人生伏臘謾多憂滿盆淅玉休論價成斛量
金不計籌最是野夫懽喜處春風百甕遶床頭

次君玉弟聞新鴈

霜風颯颯荻花洲避北趨南巧自謀倦翮飛殘千
里月寒聲催老一天秋乍教騷客驚詩夢莫爲征

夫寄別愁汝度塞垣應未久新來烟燧已沉不

次韻東渠兄觀梅

詩眼非梅不可遮三葩五蕊便堪嘉瘦如飯顆逢
工部老似磻溪卧子牙水影月香參衆妙弟酬兄
倡自成家快蕩新醞同清賞莫待枝頭爛熳花

閑居幽事

閑居幽事屬田園何必山林始避喧足水早未分
母子多年脩竹見翁孫欣然勝敗無心奕兀爾醉
醒隨意樽昨夜一番雷雨過綠波微漲曲池痕

甘窮

自甘窮處更何疑
坎止流行信所之
不學昌黎驅五鬼
肯隨子厚罵三尸
堂堂白髮欺人出
耿耿青燈獨已知
細嚼黃花香滿齒
清風千古一東籬

送彭希聖姊夫赴三山民曹

槐笏綠衫初作吏
要須立脚自廉勤
閭閻疾苦宜加意
殿廡竒贏莫與聞
少啖荔枝防美疾
多栽茉莉挹清芬
公餘覽徧佳山水
倘有詩篇寄海雲

己亥九日屏翁約諸孫登高西嶼阻風舟行

不前遂會於吾家山海圖之上酒邊翁有詩

留題因次韻

良辰樂事兩相關喜我樓臺便往還不用移舟過
西嶼只消把酒對南山風於破帽如先約菊為新
萸欲笑顏留作千年佳話處詩翁醉墨照楮間

秋日獨倚東樓

重陽過了秋逾爽自豁樓窓眺晚西野外倒涵天
影動海雲平壓鴈行低興來頻放深杯飲吟到須
還大字題近喜書房添一寶陶泓買得古端溪

次韻屏翁壬寅九日再題小樓

佳節相過共舉觴，爲萸菊醉亦何妨。
須知我輩襟懷事，不是時人酒肉狂。
落鴈影邊寒水碧，歸鴉啼處夕陽黃。
詩翁樽俎風流在，老氣橫吞年少場。

初冬梅花偷放頗多

清樽纔了黃花債，又被梅花惱殺人。
碎點南枝無數雪，探支東帝幾分春。
精神全向踈中足，標格端於瘦處真。
徹夜苦吟無好語，夢隨雙月步溪湄。

石屏後集 錢梓敬呈屏翁

新刊後藁又千首近日江湖誰有之妙似豫章前
集語老於夔府後來詩梅深歲月枝逾古菊飽風
霜色轉奇要洗晚唐還大雅願揚宗旨破群癡

四月即景

茶歌纔了又田歌節物真成一鳥過蒼竹招風涼
意足碧梧留兩夜聲多瓜綠茅屋抽長蔓藕過蔬
畦出矮荷最喜白鷗相狎夕對人自在浴清波

次韻鄭安道懷君玉弟游東嘉

好山好水東嘉郡兩月清游樂可知遠想池塘頻

夢汝還當風雨對眠誰別時菊蕊方宜酒幾日梅
花已索詩鴈影參差霜正冷寄言歸計莫遲遲

贈日者張異手

張兩手合七指因以為號

漫浪江湖等泛萍破囊惟有百中經一吮辯處長
三寸兩手生來應七星笑汝道途多坎壈說人禍
福太分明我今已決為農計不解從君較五行

代簡寄謝友人

經年未復寄來書索我形骸莫太踈鮑叔相知應
似舊嵇康習懶苦難除白頭閱世梅花老青眼看

人柳色舒春月正圓春水滑何須雪夜扣吾廬

春事

春事關心常早起愛看景物試凭欄戲魚池面微
添綠啼鳥枝頭尚帶寒斬棘重樊新挿柳對泉頻
灌自栽蘭年來賸有園林興每恨廬邊地不寬

如京至西興阻風雨

月將圓夜出鄉關纔到西興月又殘老去問名先
已懶近來行路覺尤難雲烟漠漠吳山暗風雨瀟
瀟浙水寒識破人生真逆旅此身何處不堪安

賞茶

自汲香泉帶落花
漫燒石鼎試新茶
綠陰天氣閑
庭院卧聽黃蜂報晚衙

夜過鑑湖

推篷四望水連空
一片蒲帆正飽風
山際白雲雲際
際
月子規聲在白雲中

喜小兒學步

對周尚有六十日
舉足已能三五移
世路只今巖險甚
須教步步着平夷

效宮詞體

楊柳萬絲堆怨緒
丁香百結鎖愁腸
小桃先得東皇寵
莫妬東風過海棠

讀陳元龍傳

九州四海沸如湯
問舍求田策最良
豪氣到頭成底事
未容欺客卧高床

嚴子陵

赤伏君王訪舊遊
富春男子只羊裘
一竿本爲逃名去
何意虛名上釣鈎

竹林避暑

自抱桃笙過竹林濃陰一片直千金清眠盡晚無
人喚時有風鳴石上琴

夏晝小雨

小床蘄簟展琉璃窗外新篁一尺圍正午雲橋踈
雨過冬青花上蜜蜂歸

里中小漁舟被差防江有感而賦

着身平地更多憂一棹思爲返宅謀昨夜西風邊
報急防江也要釣魚舟

天台道上早行

籟輿軋軋過清溪
溪上梅花壓水低
月影漸收天半曉
兩山相對竹鷄啼

五禽言

提葫蘆沽美酒
人世无陰春電走
一日得醉一日閑
綠鬢幾曾俱白首
沽酒沽酒有酒沽
生前不飲真愚夫

不如歸去不如歸去
千山萬水家鄉路
今年又負故園花
來歲花開定歸否
歸去歸去須早歸
近日

江湖非舊時

泥滑滑泥滑滑客路迢迢雨不歇我僕十步九步

蹶我馬驪

力涉反驪

蓋反

如跛鼈泥滑泥滑君莫愁秧爛

麥損尤堪憂

脫却破袴脫却破袴蚕熟繰成霜雪縷小姑織絹
未落機縣家火急催官賦輸了官賦無零落破袴
破袴還更着

麥熟鍛磨麥熟鍛磨村南村北聲相和大男小女
總欣欣煮餅蒸糜任渠做鍛磨鍛磨莫等閑去年

糠粃無得餐

青陽梅仙舒伯虞爲其尊人索靜閒軒詩

人心元至虛天下本無事舉世役於形擾擾誰暫
置先生自超俗涵養老逾粹妙契無名翁深造靜
閒味壺中貯日月胸次納天地婆娑閱四序物物
見春意林花高下紅庭草淺深翠一笑扶瘦筇行
吟散微醉

壬子立夏日同郡博士黃次夔游江祖太白
釣臺因成古詩併呈偕行諸丈

翰林天酒星謫墮人間世豪氣眇乾坤浪迹寄湖
海峩峩江祖山片石峙西澗醉狂御風來踞坐高
傲睨一絲聊戲垂意得在魚外青天畫屏句妙越
無塵界至今五百年春虹絢晴彩我來訪遺蹤躡
袂捫薜荔錦苔剝冰霜髣髴題字在屬時春夏交
微雨弄輕霽同遊俱嘉朋笑語洽傾蓋雲木團晝
陰松風奏天籟勝踐心已愜酣歌意彌快欲招臺
上魂舉爵酌清泚今昔自殊時欣感諒一契詩成
寫蒼壁存否非所計長嘯下歸舟驚湍送飛棹白

秋浦詩紅樹一片石青天掃畫屏題詩留萬古綠
字錦苔生即其地也

梳頭自歎

短髮如冬霜一朝白一朝又如深秋柳槁葉迎風
凋白者不再黑白者不復牢羲娥疾馳驥乾坤虛
懸瓢人生寄其間泛泛波上藻百歲一大夢倏忽
已隔宵胡不適所適而乃隨滔滔富貴撇眼電榮
華過耳飈木散故得壽龜靈徒取焦甘拙自安吉
後智滋勞切所以柴桑人不肯折此腰

饋林上立齋先生十首以有官居鼎鼐無宅起樓

臺為韻

形弱能使強脉病能使壽醫和肘後方袖手若無
有綠野歸晉公洛社閑迂叟此意誰得知可以久
則文

羸牛指為驥鳴梟認為鸞彼欲欺一世自亂耳目
官吾直不能枉吾方竟誰利何妨寄楚澤餐菊紉
秋蘭

蔚蔚空明山古號仙人居神秀發虹氣瑞孕真璠
璣潔白外難染堅剛中不枯勿逐鼠璞價韞匱姑

歲諸

支厦濱寸蓮涉江寄孤艇弗顧勝弗勝乃諉幸不
幸舜華朝暮期蒼松歲年迥從渠寶康瓠我自有

岑鼎

君子如真金真金剛不改小人如浮雲瞬目多變
態隨世良獨難殉道乃無悔近日崔菊坡堅卧辭
鼎

薰猶不同性涇渭不同趨由來區以別那使強合
汙老聃守道德韓非事刑誅二人共一傳能信千

古無

多金建華屋一堂容百客立齋有聽事不覺旋馬
窄僻於蕭相居隘甚晏子宅鬼神瞰高明吉祥止
虛白

靈岩一片雲曾爲作雨起風吹還故山松筠澹相
倚秋高霜露寒酒熱鱸魚美少寬憂世懷微醉有
妙理

否泰關世運進退非人謀尼父雖皇皇不爲無理
留用則巨川楫舍則野渡舟行藏兩付之獨倚石

尺樓

小草有遠志埋沒同蒿萊風霜坐相欺冉冉成枯
萎我公下白屋意重黃金臺儻借伯樂顧未信終
駑駘

江濱晚霽

十里平沙路人行晚霽間水光涵遠樹雲影度空
山吹浪江豚怒摩霄野鶴閑漁翁醉吹笛小艇泊
前灣

十日取野菊泛酒

野徑菊仍好村壚酒亦嘉未應今日蒞便是背時
花心在家千里身猶客九華官程難久駐風雨暮
山斜

山家小憩即景效藥名體

柴門通草徑茅屋桂枝間脩竹連翹木高松續斷
山仰空青蔭密掃石綠花斑傍澗牽牛飲白頭翁
自閑

從板橋買舟上青陽

卸馬板橋西扁舟逆上溪水鏤岩骨斷烟截樹頭

齊野鴨驚人起村鷄上樹啼老農頭雪白猶自把
鋤犁

池州

一城方九里宛在水中坻額揭顏公字碑傳杜牧
詩昔年稱上郡今日逼邊陲莫望長江北天寒風
正悲

有永嘉薛君自號雲屋來池陽以詩見貽用
韻答之

清晨聞剝啄喜得薛能詩風月一囊錦江湖兩鬢

絲寒城吹角夜孤館擁衾時誰會吟心苦梅花是
舊知

有方叔材用余和薛雲屋歌見貽次韻奉酬
江湖前輩盡何敢易言詩鼠璞元非玉蛛羅不是
絲池塘生草處風雪跨驢時此是真吟境從來幾
箇知

立春前五日得雪

雪作春前瑞銀城擁萬家太婆頭欲白九子頂先
華壓麥嘉培本封梅惜損花家童解人意燒鼎問

烹茶

七夕感興二首

家家懽笑迓星期我輩相邀只酒卮
矯俗何須標犢鼻甘愚不解候蛛絲
新秋光彩月來處半夜清涼風起時
一曲玉簫塵外意此音除是鶴仙知
相傳牛女起何時無柰人間事轉癡
青鳥蟠桃方士信金釵鈿合逆胡基
一杯記節圖成醉萬感因秋却易悲
遺恨古今流不盡銀潢耿耿接天池

抵池陽未入關泊于齊山數日因窮岩壑之

勝山有翠微亭杜牧之登高處

瘦策相扶上翠微
眼驚竒恠足忘疲
三十六洞猶昔者
四百餘年無牧之
漲水森瀾春雨後
遠山重疊夕陽時
幾多江北江南恨
問着沙鷗總不知

次劉叔子總幹夜坐感秋韻

秋風遠客歎飄零
滿鏡吳霜故故明
酒盞論心疎舊約
詩筒到眼快新評
短檠伴我夜深靜
長笛何人月下橫
步遶空庭吟未竟
隔林鸚鵡又傳更

代簡約諸同官探梅

信是搏沙放手開，渴心空想細論杯。
等閑不見便逾月，如此相從能幾回。
舊雨已孤重九菊，新詩宜採小春梅。
騎驢索句真頰面，要向清溪洗出來。

燒燈夕，宋明府自置酒見招席上復賦詩因
次韻定詩盟，併致別意。

苦用吟心續祖燈，得君印證愈分明。
一聆此日鷄窓話，盡洗前時蚓竅聲。
颺柳輕風寒忽暖，催花小雨濕還晴。
眼前總是詩光景，可惜明朝又遠行。

秋暮出關即事

俗塵汨汨負清遊重出城來已暮秋水洗柳根
斷岸霜摧蘆葉擁荒洲鄉音不到愁來鴈野性無
拘羨去鷗可惜一堤明月好隔關難作夜深留

有妄論宋唐詩體者

不用雕鏤嘔肺肝辭能達意即篇章性情元自無
今古格律何須辨宋唐人道鳳筒諧律呂誰知牛
鐸有宮商少陵甘作村夫子不害文光萬丈長

趙倅賦喜雪詩爲黃堂賀黃堂和韻傳示僚
屬衆因續貂

風袞瑤花撲面寒
沾泥點點鹿文斑
要呈臘瑞闥
梅好肯讓春容傍
柳還萬戶鬧
添沽酒市兩山窮
聳索詩有史君寬
得憂民念麥隴
青青一望間

次韻黃次夔思家

世態從渠炎更涼
蕙蘭元不爲人香
時憑酒挹聖
賢味閑借茶搜
文字腸
靴笏豈能拘野性
尊鱸終是憶家鄉
小需歸作天台隱
長嘯松風卧石梁

送陳竹屋提幹東歸

生長由來接社枌
台山越水偶中分
一朝傾蓋便

知我千里携家得傍君風厚大鵬培怒翼天寒征
鴈折同群折梅相送齊山路愁絕江東日暮雲

歸途過麻姑山

山行十里少人家客子貪程怕日斜倦坐松根需
足力輕風滿面落藤花

方岩山有仙人田頌宜父家其下於屋之西
偏築亭疏沼雜蒔花木爲娛奉壽母之地即
以名之自著懷仙雜詠百有一首名勝留題
亦多未免皆泥乎神仙之說來徵余吟余謂

石屏卷九
神仙之事深言之則似誕今諸賢所賦無復
餘蘊使余更下注脚不愈誕乎且人生一世
苟能超然達觀惟適之安斯人中之仙已豈
必十洲三島間之謂哉因即此意賦十章

築亭䟽沼隔塵埃
白白朱朱次第栽
人面春風俱
不老板輿日日看花來

綠蘿翳翳結高林
烟吐霞吞一徑深
半夜松涼鶴
先睡滿山明月自橫琴

一澗寒泉九節菖
釀泉爲酒冽仍香
玉卮捧處慈

顏喜眉壽方岩共久長

有時山洞拾荆薪應遇真仙對奕春多少胸中高
著處儘教饒盡世間人

秋池清曉濯玄雲鸚眼輝涵紫玉文細字黃庭應
寫就莫將容易博鵝群

桑竹森森遶屋邊美池清泚浸良田桃源只在桃
溪上不信壺中別有天

晚菘早韭各隨時霜蕤青青間露葵甘脆日堪供
小摘不須他覓養神芝

紫錦囊絨五嶽形白書黑紙秘黃庭何如琴几焚
香坐細讀包犧一卷經

自傍青牛種早杭炊來玉雪滿盆香休論服日餐
霞事只此延年第一方

阡陌縱橫尚宛然知他耕耨是何年果然絕粒輕
能舉底事仙人亦有田

五松山太白祠堂

太白讀書之地詩有要迴長
舞袖盡拂五松山即此山也

艤舟來訪寶雲寺快上山頭尋五松捉月仙人呼
不醒一間老屋戰西風

歸途過銅官山

山徑崎嶇落葉黃青松疎處漏斜陽鳴禽無數聲
相應一陣微風野菊香

余效官秋浦公餘弗暇他問獨未能忘情
於吟九得諸山川之登覽景物之感觸賓
友之應酬率於五七字寄之雖草根啜啜
柳稍嚙嚙視鳴高崗啖九臯聲韻邈乎不
伴而發半情則一也抖擻破囊九百篇輒
忘其醜錄以備或者楓落吳江之問寶祐

改元癸丑脩禊日東整子戴昂自叙

石屏詩集卷第九終



石屏詩集卷第十

附錄

戴漁村詩

漁村諱木字子榮水心葉公高第神童之父著有漁村集

賀杜清獻入相二首

玉陛傳呼宰相來
 驩騰海內翕如雷
 律身清介祁公操
 佐主謀謨如晦才
 夢弼已知符衆望
 生賢益信應三台
 從容宰席調天紀
 協氣從頭徧九垓
 相公出處繫安危
 當務何先諒熟思
 守令近民須選擇
 儉壬蠹國亟芟夷
 精蒐邊面三軍帥
 早建皇

石屏詩集卷第十



儲萬世基納誨進賢尤素志佇看經濟大猷爲

林曉庵先生云清獻大拜時戴漁村先生賀
以兩詩與世之獻諛者異惜公不久於位
而此詩遂爲空談國家無福也哉又嘗跋
公類事蒙求後云昉少聞葛元誠兄弟谷
口鄭東子漁村戴子榮皆師事水心葉公
學有根據稍長見葛鄭詩文爲多戴文特
未之見獨見其悼子頽老神童之作并將
終自挽之章又聞其彙聚古今奇詞偉論



成蒙求一編絕出唐宋類書之右中年與
其族子匠監丈希尹少府君方大遊訪尋
是書咸謂燬於德祐丙子之兵莫有藏者
私竊惜之辛亥冬末偶遇彥綸父子高洋
田舍酒邊出所謂漁村類事蒙求者三十
卷於是大慰夙心閱之通文信有古人所
未到者作而嘆曰先生以此惠後學博矣
抑堅甲利兵林立郊野將而用之存乎其
人複襍山積而不能構一室非匠之良者

也然則先生之志要有寄於書之外者豈
獨區區於此自衛其所學之富也哉半山
後學林昉百拜敬書

戴秋泉詩秋泉諱駉孫字萊夫元人

自嘆

母病因無藥兒啼爲絕粮壯心雙劍在逸興一琴
橫

行住坐卧

一片雲單百念清點塵飛不到踈櫺世間俗眼從

教白天外好山無限青不是道人偏好睡只緣世
事不宜醒無榮即是長生藥何必松根長茯苓

都下送盧白雲歸黃岩

萬里鶯花送客船自嗤孤鶴尚留燕多應別後相
思處只在清風明月邊

江北江南漫浪遊眉頭不著古今愁錢塘三月春
如昨第五橋邊好賃舟

長笑相逢又一年五雲琴劍忽飄然若逢委羽山
人問道我踈狂只似先

我笑白雲忒自由白雲笑我太無憂他年相約結
庵處只在天台山頂頭

戴充庵詩

充庵諱養吾字浩然洪武間任湖廣武昌教諭

題姪昇仲悟非軒卷

悟非軒中悟非子青年意氣誰人似驥子墮地毛
骨竒一日應須一千里散蹄仍騁康莊步躔蹶俄
投嶮巖裏金鞍斷缺青鞵垂顧影猶矜舊鬃尾悟
非子窮通否泰循環理迷途未遠已知復此去平
平有如砥茫茫天地生物多人寓中間一塵耳乘

流遇坎無不安奚用區區計
遐邇悟非子扁舟東來沂
江水竹林癡叔江夏師長
日低頭課經史是夕中秋
月正圓尋我庾亮南樓前
孤懷哽塞不自已頻揮雨
淚猶漣漣青燈相對如夢
寐身外萬事無庸言十年
兩度得見爾重爲後會知
何年悟非子爾行勿匆匆
繫船鄂渚望南極掛席洞
庭須北風悟非軒內圖書
府悟非軒外松栢叢歸到
南寧百無恙早寄書來慰
老翁

送汪憲副歸江西

爲君沽黃鶴樓前酒爲君折武昌營外柳君持酒
盃挿柳枝聽我長歌爲君壽古人重惜生別離臨
岐每進酸苦詞此日送行談且笑舟子吁恠沙鷗
疑江湖歲月驅人老百慮無如歸去好我今歸計
雖已成尚復多君乞身早好風南來川斂霧寧向
征夫問前路栢府諸郎上馬回口縱不言心竊慕
山中老屋蒼蒼淨掃東軒置竹床客來問信寒
溫外唯呼茗椀傾詩囊君住江西我浙東暮年出
處偶然同投林倦鳥各斂翅天地迥濶何由逢南

浦雲西山雨變態陰晴翻覆屢飽乘一味北窓涼
此樂無庸向人語

題錢舜舉所畫梅花卷

千古懷人費夢思殷勤卷贈歲寒枝錢塘江上花
如雪不耐東風畫角吹

戴樗巢詩

樗巢諱瑞安字文信洪武間登制科進士任監察御史陞四川按察司僉事

別姪元明兵馬

十年湖海歎飄蓬邂逅相逢若夢中羨汝歸田今
有擬慚予竊祿本無功窺身幸免投狼虎分手愁

看逐燕鴻他日夜即傳放赦竹林還復舊時同

戴介軒詩

介軒諱奎字文祥洪武間任齊河縣主簿

舍姪元明書來致當道薦拔意詩以荅之

郡國衣冠逐日新老懷深念竹林人客邊風雨十年
夢醉後乾坤萬里春雲路尚淹麟閣遠秋天空
薦鷄書頻不痴濟叔勞持論今向烟波理釣緇論一作論
遷逐甫還次韻荅舍弟文信

萬里輿圖新入貢一時故老復遷官祗緣舊國輕
周鼎徒使仙人泣漢盤斤斧未容遺撲檄階庭誰

見長芝蘭野夫獨幸歸耕早只恐鄉關路轉難
舊事紛紜成昔夢餘生竄逐誤微官一年道路危
三峽幾度歌吟繼五盤甄別有恩垂藻鑑芬芳無
德播椒蘭逢人但說生還喜莫問從前事急難
南冠暫掛終還國野服重裁豈厭官漫有圖書連
夜榻可無魚蟹薦朝盤歸時涼月侵衣葛別去秋
風颯佩蘭今又相望冬夜雪撥灰思共竹爐難

掛一作戴

題錢舜舉所畫梅花卷

雲溪畫師名早傳畫梅不作鍊
璣圈湖山入夢既

瀟洒粉繪落紙尤清妍巴西故人玉堂老別去幾年音問少溪雲山月不堪持一枝寫寄春風早想當盤礴欲寫時寓情筆底誰能知心期不負歲寒意貞潔要如冰雪姿到今令人歎竒絕我亦見之慚蹇拙從誰交誼重金蘭空慕廣平心似鉄

別弟文益往蜀省按察僉事文信

我家遷居自閩土傳世於今十又五源源始從五季來子姓咸知立門戶儒賢術業每升堂雲路登躋亦聯武石屏先生曾叔祖錦綉輪囷作肝腑平

生蹤跡半江湖只把文章傲珪組汝昔嚴君雲錦
裳金臺之上長翱翔雄篇大字照玉署詩名政譽
流錢塘邇來書聲雖比屋愧我弟兄俱碌碌未看
庭砌長芝蘭祇見蒼藤翳喬木唯君伯氏振文風
雲夢八九吞其胸春秋與義 剗五傳同異資
磨礪射策丹墀始擢桂拜官烏府俄乘駟去年承
恩入西蜀黃麻紫誥相追逐豈唯持斧備凶邪要
使褰帷問民俗汝今爲第能念兄萬里行色何筮
筮瞿塘無復向時險劍閣試覽前賢銘成都魚肥

酒正美一奏埴篔萬重喜世間之樂此最真白璧
黃金何足擬當時勝跡紛在目想見追遊日不足
浣花杜老或同吟市肆君平時就卜武侯勲業誰
可續古栢森森見祠屋地偏莫展王佐才感舊寧
無淚盈掬汝兄汝兄我同行我久衰殘爾何壯沂
流不得徃相從寄語聊能問無恙囊衣自昔可全
名意茲由來足貽謗保茲清白早歸來鶴髮慈親
倚門望

又送文益兼懷文信文善

天寒冀北野草黃，騏驎空風吹鴻鴈，斷相失雲萬。
重人生篤天倫，所願出處同一朝，異南北，悵望俄。
成翁嗟哉爾，兄與我弟從別立，園今幾載，雖知官。
事正紛如，想見此身能健在，池塘無夢夜如年，棣。
萼逢春愁似海，君不見楊家椿，津義讓，敦千古，共。
稱賢弟，昆又不見淮南俗，夫良可鄙，尺布之謠，污。
人耳，爾今爲弟，孝友聞眼中，清白賢愚分，思兄不。
憚萬里遠，世間骨肉徒紛紛，陳爾殺酌爾醴，取樂。
何妨艤船待，到時二子即問予，卧病祇今茅屋底。

羸軀不解事耕鋤弱子那知習詩禮唯能力疾上
高立北望長淮淚如雨

與趙思晏賦來青樓雖作而不與

存耕道人過我遊不減雪中乘興舟浮雲世事口
不掛語語索賦來青樓樓中之人何舉舉肯使餘
生在泥滓春風石上鼓瑤琴夜雨燈前列圖史有
時凭高一撚髭汀烟沙鳥皆吾詩鈎簾曉掛搏桑
影釣絲晴骨珊瑚枝方壺蓬島誰解識霧散雲收
翠如織山勢疑將度海來嵐光屢見排簷入問誰

於此賦詠頻哦松大筆尤清新石門老翁扳桂手
湖山處士吟梅人嗟予卧病筆硯廢欲作歌詩動
經歲神遊意想一語無幾回虛作凭闌勢吾聞仙
人好樓居時能御風遊六虛爾今九骨倘未換大
藥好乞刀圭餘不然買魚仍釀秫樓頭日與賓朋
集坐令青眼客長來不獨來青在山色

賦雲浦

君不見南浦朝飛盡棟雲滕王勝迹今徒聞又不
見洞庭之南瀟湘浦雲冥冥兮別離苦何如陳君

結屋浦上頭，卧看雲氣空中浮。百年無夢到朝市，
九夏不暑疑清秋。我惜於君面未覩，即遣狂言問
雲浦。既不慕傳說作甘霖，又不學西湖載歌舞。胡
爲寂寞在窮荒，闕世悠悠任今古。應君知爾乃最
先褒，竒頌美詩滿編南湖暇。日持示我索賦長句
俄經年，昨者州司催上道。念此逋負增惓惓，尚冀
餘生逼衰病。乞身定許仍歸田，葺茅亦向浦頭住。
濯足還共雲間眠，斯言他日倘可踐。長與爾兮相

周旋

陳楚賓邀登南閣出示諸公所賦詩十又四

首索予繼賦

憶別高堂凡五載今日重邀鬢毛改長老驚爲倒
履迎林園却似留春待那知憂患餘復見風流在
松間舊榻下陳蕃席上清樽傾北海是日雲銷天
宇澄大開南閣邀予登釣簾晚山萬樹出俯檻晴
塢千花明予以勘古易寫道經道然已足怡吾情
少長須臾亦星聚歌吟間作如韶鳴乃知世間此
地即仙隱樓船萬里何必求蓬瀛主人愛客情益

至欲起索歸挽復住呼兒床頭出錦囊示我以詩
十有四作者徃徃皆故人清新首得中卽向君家
二叔尤老成相隨地下脩文去祗今善鳴遺十餘
喪亂饑饉還何如留題已愧我獨後感念存沒增
嗟吁何當歲時稔早使貢賦輸釀爾秫饌爾魚奉
親之餘課子書功名不慕麒麟畫校讐豈羨天祿
君鹿門老翁且自適頽巷是子何妨愚更須閣上
芸編益置三萬軸我亦有時與子同卷舒

發澄江述事言懷

憶昔歸隱東海頭，矢心不逐群兒遊。結屋空山卧
深雪，篝燈永夜吟清秋。如此棲遲踰半紀，自甘疏
糲餘無求。長竿或從嚴瀨釣，短筆肯效班生投。海
國紛紛擅豪右，五花駮馬千金裘。一朝城邑化焦
土，肉食竟爲何人謀。榮悴由來易，反手諸君尚喜
能包羞。州司惜無涇渭辨，遷逐乃欲窮岩幽。謇予
貧病亦在遣，矯首上訴嗟何由。陶令徒知解印早，
鍾儀柰作南冠囚。呼天呼人兩無及，反躬祇益思
愆尤。唐君新作吾州守，溫詞直欲紓人憂。爲言今

日百政舉

詔書每爲徵賢優築臺行從郭隗始借箸欲藉張
良籌榘楠匠石安肯棄參苓藥籠終俱枚浮梁側
畔艤船待奮志好去無夷猶聞言錯愕惟掉首智
愚今古寧同流吞聲不發出城去澄江萬頃寒悠
悠緇塵上衣日黥黥飛雨洒面風颭颭迴頭却語
二三子故林爲愛藏書樓趨

朝乞身幸見許便擬散髮歸丹丘

留別胡叔輝先生

千山起伏如海濤中有萬八千丈天台高故人結
屋隱其下老氣直與山色爭摩霄平生不慕青紫
拾放浪每逐真仙遨歌詩有時落城府鏘然遺響
如鳴韶嗟予遠道廿載久羊腸九曲躋板勞石梁
回望不可躡思君幾度心搖搖前年歸耕計始遂
石田茶堇甘耘藉望君道里尚三百聚首未得相
招邀海隅

詔令一朝布憧憧去蹋三吳路趨召初聞只貴豪
竄遂旋知及寒素人言珪組累我歎儒冠誤親知

日去眼何期與君遇皓髮同驚亂後看青眼還如
向時顧長鬚長鬚君一呼倒囊贈我千青蚨金陵
春色幾萬斛到時莫惜頻頻沽感茲厚意心轉惡
但願君今事耕斲後來孫子知讀書勿慕前賢學
干祿

聞有汴京之行留別壽幙吳仲素

長淮南北知幾州壽陽還在淮西頭昔年此郡屢
反覆祇怜淮水唯東流版圖一朝歸
上國亟爲遺民救顛踣材誰復歎賢勞入幕况

聞優贊畫延陵季子千載名今君秀拔真雲仍平
生操行果何似朱絲絃直冰壺清江南遷客多如
雨老幼扶携適茲土間關來就衽席安勞來使忘
行役苦就中窺逐誰最貧石屏孫子林泉人袖有
文章賤如土眼者旣益空生塵秋風一夜振林薄
毛骨蕭森已非昨千里雖殊驥尾蠅此身却愧鷄
群鶴扁舟汴水行復汴肝膽崢嶸向君露人生離
合不可期青眼何時重相顧

賦西村耕隱

斯人好文仍好奇酒酣索賦西村詩解衣爲君揮
翰日束書正我朝京時嗟吁二人本同里暮暮餘
陰接桑梓幾乘蠟屐蹋春泥亦棹蘭舟泛秋水君
家實住小嶼西山田日日催耕犁草廬年來卧不
住致身却向黃金臺當時青紫能拾取清夢只今
成栩栩故國遙遮天姥雲謫居同聽長淮雨鳳詔
新從天上傳君應早晚能歸田種柳重尋元亮宅
說稼好誦坡翁篇錦囊多詩總如玉更有遺金買
黃犢扣角無爲長夜歌掛書莫向傍人讀予生有

計不自謀硯田禾黍無時收何得西村一相遇爛
醉白酒黃鷄秋

應朋來臨別索題存耕舊隱圖

憶昔百丈岩前遊泊船去登湖上樓天清野曠一
凝望錦屏森列當前頭中見蒼崖拔地起絕憐嘉
木連雲稠窳窳回溪出僧宇參差危壑生懸流人
言此地倘歸隱布衣便欲輕公侯茅屋春深薜荔
長石闌路遠叢萱幽長鏡茯苓靜可斲空林柿葉
寒仍收回頭世事忽如蝟廿年誤向紅塵任不知

何日繼追尋每憶此山勞夢寐應君示我新畫圖
開卷中堂起烟霧摩挲濃墨思舊經却似登樓看
山處君謂松根即故廬一榻左右俱圖書沙田水
足牛力壯歸耕試論今何如先王井田法已墜阡
陌鈎連屬豪貴前年東家強索租今年租入西家
去白雲蒼狗在須臾能事只耕方寸地父老同知
稼穡難兒孫共獲菑畚利秋風歸帆我獨遲石田
草莽耕何時君行已得圖中意臨分爲寫存耕詩
謝玉成翁大中潘士湜諸公邀僕與宗性之

城西樓登眺久之乃復宴餞南城下因賦詩

留別

頻年種菊花遶籬床頭釀林復如池看花把酒雖
足樂風雨每迫登高時今年客居向淮右吟對晴
暉教回首短髮空吹落帽風濁醪尚負持螯手諸
君文采孰可儔皎皎玉樹臨素秋相逢欲作開口
笑携我共上城西樓平原草深湖水濶此地幾經
人戰伐沙頭白骨疑亂槎天際青山猶一髮樓前
候鴈無數飛引領未得同南歸悲秋豈無宋玉賦

石屏卷十
八十五
洒淚恐濕牛山衣
沉吟復沉吟
相看鬢成雪
况微經濟才
奚事承明謁
此日華筵為我張
西風遠道
憐人別堆盤
鱠鯉鮮可嘗
照眼幽花瘦
堪折雙瓶欲盡笑
語譁接離
倒著舞僂僂
但拚酩酊醉於昨
莫因蹭蹬愁如麻
八公下淝水
涯平明東書上船
去別君
又是初辭家
朝廷製作尚有待
君須秣馬膏其車
我亦遲君握手談京華

賦竹坡

旁隣異花多
遠屋慢紫妖
紅眩人目如
澠美酒花

下傾歌舞朝朝看不足君家美竹綠坡生蕭森却
似篔簹谷騷人墨客爭欵門好事日題詩一束山
陰高致世豈知旁隣舉手休挪揄顛風惡雨一夕
至芳菲狼藉成嗟吁此君節操祇自如雪霜縱遇
那能欺幅巾藜杖久可傍筆床茶灶長相隨我記
扁舟昔相過醉向沙頭竹根卧君時宦遊閩海間
竟日孤吟復誰和今同遠客心欲摧舊徑蕪沒何
時開春雨遙知子孫長秋風不報平安來山堂忽
聞詔許歸滿引竹葉歌竹枝到家截取一二管請

君持獻伶倫吹九苞彩鳳當來儀

贈別鄉友陳繼善王宗儒及表兄王友諒同

赴京議禮

蟄雷初動連月陰臨安客舍春草深披衣起踞木
榻坐竟日倒掩柴門吟誰能載酒問奇字敢擬乘
興來山陰諸君扣門忽剝啄何異空谷足然音嗟
予托交舊不薄異縣相看客懷惡羈離雖幸一身
存問答不知雙淚落世間幾度卜非熊兵後何人
怜屈蠖耕鉏有夢空涉春煖勉多君尚如昨窮簷

牢落風雨俱君來復別將馬如

龍飛九五萬物覩紫泥屢下徵賢書三千禮樂須
制作奮衣徑謁承明廬我記論文昔分席人品當
時似能識陳君學術窺天人王子文章振金石吾
兄抱才猶絕竒如椽大筆千鈞力今同薦刻入雲
衢總有天官在胸臆人生窮達那自知君能論列
須及時漢室仍傳賈董出虞廷再覩夔龍趨書成
志得未白首錦袍相輝印懸肘此時題字倘相投
我已滄浪一漁叟

贈別柯伯庸歸省親柯自龍虎來臨安邀予

三茅山中出示方壺所作東柯谷圖及翰苑

諸名公詩一帙且曰吾垂白之母在堂將歸

省焉請與子別因賦此贈

東柯谷者蓋其家居地也

天台萬八千丈高挿天勢與鴈岩天姥諸峯連芒
鞋竹杖昔尋訪層巒絕壁窮扳緣是時憑高一縱
目異境復來東柯谷幾灣流水聯玦環數點晴峯
刻瑤玉回頭十載昔未遊黃塵撲面雙鬢秋柯君
一見與我談舊隱剪燭共醉吳山樓示我東柯之

圖纜數尺元氣溶溶霧烟濕玉堂諸老亦神仙錯
落文章列圭壁君言束髮居龍虎學仙期與松喬
伍生平雖只戀還丹歲久寧無念鄉土嗟吁故林
歸獨逢相逢異縣兼喜悲細觀詩畫久不厭躊躇
如在登臨時錢塘五月熟梅雨此日怜君一帆舉
縮地應無跋涉勞升堂要覩慈顏喜紫霓裳丹霞
酒拜奉親前爲親壽喜懼雖因鶴髮前踟躕復似
斑衣舊西風一日秋滿山群仙有約須君還路經
茅君壇下幸相報我亦從之放迹蓬瀛間

送別陳嘉惠

歲丁酉僕以事至贛見嘉惠陳君知其非庸衆人也與之盤旋月餘乃復同舟下豫章相從嬉遊歌詠者又數月既而君以母老還侍僕亦歸吳中邇來音問不聞惟日往來于懷也今年仲夏之晦於武林適邂逅見焉且驚且喜即相告以出處事君因愀然曰吾貳邑於永豐三年矣以吾不能負於丞俾仍舊職今趣行有期不得久盤

礪湖山間也宜亟歌詩爲別僕以會見之
難而索去之易其能已於言哉因賦長句
以寫感歎之意云

我記昔遊章貢臺臺前二水相盤迴登臨適與形
勝會放傲却使群公猜唯君傾蓋即相厚結交便
擬如陳雷江上時同夜月擢花前幾共春風杯移
船一向豫章泊風物蕭疎歎非昨絡繹愁連孺子
亭梧桐秋滿滕王閣同遊豈無三數公總爲異鄉
伶寂寞君時唱和詩最多錯落驪珠千百索江城

十月霜葉飛君先別我趨庭闈臨岐贈言曾未幾
東書我亦東吳歸邇來喪亂十五載旋覩海岱清
皇威每見才賢拔茹起抵懷故舊音書稀音書不
至望欲倦來遠樓頭忽相見兵後雖驚兩鬢霜老
來尚記當時面握手那知悲喜兼解囊復校詩文
遍西湖境勝蓮欲紅強擬留君日酣宴君言貳邑
居永豐斯須敢忘勤與公百里何心厭棲棘三年
報政仍哦松揚舲明日沂流上復與子別情何窮
此行實有簡書畏雖欲放浪將何從嗟吁屏居猶

是客客路聞言轉悽惻瑤琴古調且須彈官柳長
條折何益我老長同曳尾龜君行會展冲霄翮後
來雲樹各天涯寄書好慰深相憶

美巡檢秦君禱雨有感

我昔歸舟泊西浙屢上吳山望東越炎曦赫赫塵
暗天可怜不雨踰三月吾鄉岸海地勢高連滕想
見禾苗焦豐穰願望苟一失溝壑困辱將焉迓况
聞征賦日夜急孰念遺氓久顛踣歸來父老一相
迎啓口却誦秦君德秦君世居淮海東壯年脚踏

江湖空浩氣不摧萬猛士一官猶佩雙珣弓深知
警邏職匪小遇旱憂心日如擗由來剽竊迫飢寒
揭虔亟向龍祠禱奔走亦率民度稠坎坎伐鼓羅
魚羞丹誠已信齋後又一念遂達神靈幽桑林剪
爪歎已古魯公焚尫笑何補今看蜥蜴水際浮隨
覺商羊眼中舞龍蟠忽起牙角呀簸尾陰軸驅雷
車四山雲氣暗於墨半天兩脚紛如麻槁禾既甦
偃伏起民食方期有饘餌輸官豈望甌石餘爲生
庶緩須臾死嗟予聞言喜更驚識君不早徒心傾

便欲排雲上霄漢大叫閭闔揚君名吾知聖明渴
賢久徵君要展為霖手幸令九土樂豐年我獨餓
殍何辭骨先朽嗚呼我獨餓殍何辭骨先朽

題潘氏禱雨有感詩卷

連歲浮淮去為客客裏無禾亦無麥盤飧豈欲待
豐登雨暘猶知望時若今年故鄉早曠多我歸無
麥還無禾潘君禱龍雨輒應我聞兩脚醉拍船舷
歌嗟哉老夫本漁叟綠蓑飽卧烟波久中間出處
亦偶然豐歉於身果何有于今世途蜀道難觸眼

倉廩連雲端倘得年豐租賦足官府我雖愚者身
能安潘君潘君藉爾力稼有秋兮農有食衆因頌
爾能感神我亦重君無德色曉來目送南征鴻因
之爲寄雙詩筒姓名到眼不相識隔隣好問松溪

翁

臨安道中別弟文美

拂袖歸來我最先相期耕釣在餘年無端遇着東
風惡吹上長淮逐客船

三淮浪急大江迴幾處驚如滄瀕堆我正思家行

欲到汝今那更別家來
酒盡沙頭淚滿袂臨當別去更躊躇都忘我爲儒
冠誤尤囑還家課子書

天旱歲凶到家記事

歸葦茅茨江上村家貧唯有舊書存解囊欲試癡
兒誦又報催租吏打門

高陽窺園有感

桶抽連雲手自栽別來誰復爲封培棘籬缺處秋
偏早時有隣童摘實來

幾畦蔬甲一長鏡記得年前草自芟今見滿林荆
棘長令人千里望歸帆

夜宿水館

驚鴈相呼秋滿江小軒臨水似解艘夜闌不寐思
兄弟風葉蕭蕭正打窓

立秋夜涇川館中雜興兼懷舍弟

薄暮西風生樹頭坐看涼氣近人浮一年今日纔
過半梧葉蕭蕭已厭秋

山房高與鶴巢隣幾對青燈坐夜分強與兒童說

今古解通鄉語未通文
厭見啼螿近客窓
愁城難藉酒來降
瘴夷又說能
深入一夜無眠聽吠處

嘗稻有懷舍弟

曉起西風忽到門
剌炊香雪滿菟盆
懷人獨向嘗
新處含哺移時不忍吞

幾欲因書寄土宜
溪雲山靄不堪持
力田未足輸
官府念爾徒搔兩鬢絲

秋夜述懷

霜氣橫秋萬木彫月標風牖夜蕭蕭在家無限悲
秋思况爾別家千里逢

欲憑詩句寄西風吟到更分語未工月色如銀庭
樹冷一絲和露墮青虫

寄衣無便

秋風昨夜振庭柯欲寄衣裳無便過料汝羈愁如
落葉蕭騷偏逐晚風多

一秋無舍弟手書

老懷多籍得書寬幾度挑燈入夜着想為眇昏憊

病目一秋無字報平安

過青楓嶺王貞女廟

廿載江湖髮已絲
勝遊何地不開眉
筇輿今日低頭過
羞省青楓嶺上祠

經天姥嶺

天姥嶺頭花亂開
行人何日看花回
山堂舊有歸田賦
莫羨黃金正築臺

夜經吳江

長橋跨水影模糊
橋上春醪輟擢醅
明月相看情

似密伴人終夜下姑蘇

過維陽

英雄已逐風塵老城郭猶存草樹稀月下更無騎
鶴過觀中空憶看花歸

次荆山

三獻無階泣卞和相傳遺跡在林阿我來不為荆
山璞底事潛然淚轉多

元日試筆

回看客路三千里笑飲春風第一杯今日故園猿

與鶴定應延頸望歸來

士子春雜賦

吳山簇簇越山重
幾欲相尋去未通
祇有夢魂忘路遠
時時飛遶大江東

中立歸自京得舍弟首春書

石樓進士錦衣新
携取舊書歸養親
吾弟白雲長在望
何由同涉故園春

移寓後述懷

門掩朝暉睡起遲
楮衾莞席暖相宜
異鄉兄弟夢

中見如在故園耕釣時

越中有述

越客笑人輕別離
朋簪纒盍又何之
揚舲欲架胥
濤上杖策先從禹穴窺
拂石舊題看歷歷
迎風塵袂又披披
憐今不作金臺夢
定擬重來訪墨池

歸田雜詠

西江潮落暮還生
兩岸雲連綠樹平
載月小舟風浪穩
歸林飛鳥羽毛輕
儒冠謾整烏紗舊
野服新裁白苧明
絕愛方塘鷗鷺狎
向人如訴別離情

次台城南郊寄示故園

城南墟里舊盤旋
此日相看倍黯然
茅店酒醪深
夜語竹床風雨小
窓眠新愁為隔
姜肱被舊物空
懷子敬
瓊寄語門前五楊柳
好留春色待歸田

京城有述

屏跡丘園今六載
何期世事與心違
祗緣白屋隣
滄海却使緇塵染
素衣客路鳳凰臺
畔過家山
蝴蝶夢中歸
相逢不作新亭泣
幾度高歌送落暉

淮安贈葉敬先

揚子江心鼓櫂過買船今復上淮河探囊祗惜青
錢少把鏡俄驚素髮多阮藉途窮唯有淚馮驩彈
鋏豈無歌多君青眼能相顧握手其如感嘆何

舟中述事

推蓬今日又何鄉一度歌吟一感傷漂母墓前淮
水直霸王城北楚雲長倚灘舴艋樵蘇集隔岸奈
靡草樹荒經處不將風土記每因遺俗問漁郎

投贈州守夏侯君

淮水西頭古壽春遠煩賢守救遺民公庭日見文

書靜里社人懷德化淳接物以知心似水憂時先
覺髮如銀昨聞王霸終為相莫學淹流詠白蘋

雨窓述事

閭井徒勞念別離賜環何日見歸期江淮長路一
身遠風雨孤城萬慮滋往事已同槐國夢新居孰
寄草堂賞極知經術今無補猶擁遺編不捲披

寄示故人

頻年荷鍤事山田遷逐胡為路幾千故宅已荒三
徑菊愁心空憶五湖船兒孫好為青藜惜書札終

期白鴈傳鄉邑但敦忠信在莫嫌歸計尚茫然

戴竹岩

諱汝白字君玉宋人有竹岩詩稿行世

題曹娥廟

哭得江頭雲氣昏淚痕多化作潮痕波心萬古團
團月疑似曹娥一片魂

戴魯齋

諱泰字見大宋咸淳間任常州府學教

戲友不識硯

古今天下多奇石甲品從來只數端
千丈割雲潭影濕一泓貯水月光寒
青瞳要辯生鴟眼紫色須

求死馬肝鼠璞易投荆璞價請君試買硯箋看

戴脩齋

諱震伯字君省朱當塗主簿

送趙侯之任

趙侯東南彥遠作西南征驪駒向前路高秋不留
行送以奉林鶴仍吹子晉笙淵淵洞庭湖古月今
猶明流輝千萬里何但光連城懸知有佳惠終始
心和平

戴雨耕

送趙侯之任

送君遠作羊荆州送君西上黃鶴樓漢晉諸公舊
遊處斷磯黃葉風雨秋只今麾燾南斗整暇坐
列皆公侯江湖浩蕩青天流清風千古吹棹謳專
城分符得召杜見此文彩珊瑚鈎請目諫議思岳
陽遂歌羽人仍丹丘杜蘅吹香結衣珮思與老子
同遨遊

戴雲庵

諱曠孫字子雲號雲庵宋人精地理之

題五九菊

不向東籬吐正葩芳名空竊楚人家操難耐冷秋

藏色怪易趨炎夏着花輕感絳紗籠畏日薄裁紅
穀趨殘霞樽前未識淵明面醉後時還岸幘紗

戴竹洲諱龜朋字叔軼號竹洲宋人

次屏翁韻

走遍江湖早得名歸來哦句向幃屏故人今兩時
相過好酒新春肯獨醒未用阮生三語掾但遵迂
叟四言銘高明已悟閑居福當見于門發舊馨

戴菊軒諱溥字伯遠號菊軒

次屏翁韻

端居養病喜踈拙晚興相宜有翠屏對客焚香無
可說孕和唯酒少曾醒嚮來雁塔失題字何日燕
然可勒銘但學蘭蓀自孤植肯緣岩隱變幽馨
戴南隱諱焯字明遠號南隱宋迪功郎

次屏翁韻

幾番樽酒遇書檯談笑清風起座屏一世猖狂渾
似醉此心明白固長醒英雄自昔難虛老鍾鼎他
年要刻銘若見傍人問消息為言桂子待秋馨

戴挂庭

諱成祖字與正號挂庭

送留雲上人住翠屏澄照寺

雲出於山復戀山至今留住翠屏隱片雲既被山
留住雲自留山我自還

戴宓齋

諱飛

字子翬號宓齋宋紹定間任廬江

寓杭次族人催歸詩韻

休把詩來只管催也曾對菊賦歸來閑雲自笑出
山去未雨如何便得回

戴浦雲詩

仕

諱公孫字文溥號浦雲元末隱居不

客武林送林貴章還家

西風挾雨生早寒遊子袂薄行當還堂堂別我向
何所驅車直下天台山天台山高高插天子今別
去誠可憐青雲失路歲月晚黃金散盡今凄然此
行不獨子云往我亦為賊歸來篇

戴本庵

諱需字君涉號本庵元延祐間任温州路天府北監管勾

題飛鳴宿食蘆鴈

飛鳴宿食態爭竒一片瀟湘筆底移有翼不傳千
里信無聲難訴九秋悲孤眠蘆葦喚不醒遠覓稻
梁常苦飢野壁黃昏遙望處傷弓幾度悞胡兒

戴架閣

諱子璋字文珪元至正間任中書省架閣

題錢舜舉畫梅

故人相憶對南枝
寫寄無煩驛使持
此日披圖空想像
猶疑月落酒醒時

戴海門

諱應儀字文則元至正間任海門巡檢

雨窓寄友

拭目時吟望
其如景物何
過江山色遠
入竹雨聲多
徑草微通路
渠流細入河
故人家咫尺
乘興肯相過

戴碧泉

諱孟韶字原成號碧泉介軒長子

至後偶成

寒日初添一線長
可憐遊子未還鄉
梅花偏有留人意
為送黃昏一樹香

戴怡泉

諱孟姓字原進號怡泉介軒次子

送友

江臯多烈風
念子在行役
異鄉雖在邇
慈闈斷消息
草枯野空濶
鳥歸山欲夕
明發不可親
無言意

增極

戴松石

諱宗渙字原怡號松石

寄此山雲

水清風淡剡溪間一任山雲自往還怕有月明乘
興客柴門深夜未曾關

春日懷東白

去年今日送君歸已見春花兩度飛別後豈無書
可寄向來曰有事相違咲談每憶春風坐顏色常
瞻落月輝莫問名園并綠水只今光景舊時非

戴吏部

諱宗璣字懷玉洪武間任吏部主事

送陳賓赴京

漢廷曲逆有雲仍喜逐徵書謁

帝扃謾向雲衢誇逸足即看丹穴刷脩翎
新豐美酒還須醉內苑啼鶯正好聽
天上故人如有問釣竿今已占楓汀

題趙氏來青樓

倚樓孫子好樓居門外青山盡不如
對面烟嵐侵几格撲人空翠濕衣裾
留情正在雲歸盡覓句偏宜雨過初
何日登臨遂幽興臨風笑挹玉芙蓉

題趙仲淵家截巨然山居舊隱圖

趙君平生有畫癖，購畫千金無所惜。
軒窓日夕耿晴虹，鴈蕩雲烟動秋碧。
山居之圖妙無敵，巨然乃肯留真跡。
雄峯峨嵋狀廬阜，春風喬林翠如織。
柴門路入花竹深，彷彿茅茨浣花宅。
輕舟叙漁烟浪中，白石離離弄江色。
山人構思固不易，造化神機出毫墨。
摩挲兩眼看，不厭趙君珎藏信。
竒特愧我無詩如杜陵，此畫還君三太息。

戴閒懶諱子英，字文曠，號閒懶，仕至江浙行樞。

遊澄照寺

籃輿春日暖石磴轉紫廻山鳥衝烟去溪雲帶雨
來笑談忘對奕醪酎醉深盃為想竹林興襟懷好
一開

戴松澗

諱璿字文璣號松澗博覽群籍尤精於醫所著有喬雲樵唱集藏於家

題畫菜

鼎肉紛紛飮脂肥丹青摸此意何微年來滿地多
虫蠹行盡春畦見亦稀

自述松澗

處世無能祇自憐，携書投迹市東偏。
旋開草徑蒼松下，更結茅齋碧澗邊。
宿雨初收鳴雜珮，和風微度響疎絃。
餘生果遂栖遲願，疏食簞瓢亦晏然。

西澗松聲為李梅塢賦

美人絕塵想，結屋青山陬。
蒼松傍西閣，四時風颭颭。
美人愛敬客，延我居上頭。
初聞怒濤撼，旋覺虛籟浮。
宮商一以輟，餘韻還悠悠。
涓涓泉出罅，混混川漲流。
秋風吼龍虎，落月啼猿猴。
倏来自有處，忽去何所留。
拄頰坐清曉，聽之情獨幽。
怡然援綠綺，一

鼓天地秋

戴恬隱

名璉字尚重號恬隱所著有草虫集藏于家

避喧庵自詠

結庵龍鳴村地僻遠市諠四山列圖畫兩溪流淵
源紅塵隔綺陌綠樹依柴關飛花點石迳幽鳥鳴
松軒予生性多癖習懶愛清閒簔笠烟雨中琴尊
風月間詩成自刊竹興至時登山芳沼戲群鱗空
庭舞雙鶴林下見人稀對此成獨樂引泉灌園蔬
携筐採仙藥此外復何心所貴全天爵擾擾利名

場誰能免羈縛焚香讀古書晴雲鎖窓白

憶子會試無家書

白雲望爾上青雲數月泥金信未聞自卜情多夢
難准曉來喜聽鵲聲頻

戴潜勉

名弘通字允儒號潜勉成化丙午鄉貢進士弘治間任安州知州所著有秋蛩稿

藏于家

次韻謝世懋見寄二絕

未黍擬登場已洗新飯甕有田無力耕長作豐年

夢

舉目望青天欲破醯鷄甕借手獨思君夜夜迷途
夢

采蓮婦

采蓮復采蓮花雨濕衣裳明朝復出門憑誰定行
藏

采蓮復采蓮舡漾水中天含情向蓮語顏色知誰
妍

采蓮復采蓮秋風生老態花心有時衰妾心未
悴

織婦詞

蟋蟀動秋吟
燈花夜向深
辛勤機上織
未作妾衣襟

送崔冢宰致仕還鄉

出處堪為世重輕
東山曾足慰蒼生
兩京台相推先後
萬國鈞衡屬老成
野渡橫舟春浩蕩
金陵見月夜分明
始終全德今歸去
老圃寒花晚自馨

悲歌

莫對鏡莫對鏡
鬢白髮蒼容色病
莫食肉莫食肉

齒漏牙疎不可觸借問我生年幾何來日不如去
日多去日多悠悠身世成悲歌

次陳石齋留別韻

采蕨當年未說高盛名今日竟難逃爭看彩色來
虞鳳獨聽希音變楚騷魚笋有情君欲往雲霞無
意我初交桃花寂寞天台洞盡日東瞻海上勞

書石屏詩集後

天台布衣戴屏翁以詩鳴宋季類多
閔時憂國之作同時趙蹈中選為石
屏小集袁廣微選為續集蕭學易選
為第三藁李友山姚希聲選為第四
藁上下卷鞏仲至仍為摘句又有欲
以其詩進御而刊置郡齋者雖其向

上功夫未暇深論其詩已爲世重而見於板行者又皆諸名賢選摘序跋具存可考也今觀陳昉氏跋語謂其有忠益而無諂求有謙和而無誕傲希聲謂其忠義根於天資學問培於諸老方萬里謂自慶元以來詩人爲謁客者相率成風干求一二要路之

書副以詩篇動獲千萬緡往往雌黃
士大夫口吻可畏至於望門倒屣石
屏爲人則否廣坐中不談世事措紳
多之則翁之取重於世豈直篇什之
工哉成化中家君入翰林始得翁詩
寫本命金手錄每病其訛舛未有以
正也後十有五年金以郎吏倖廬罪

戾之餘時誦翁一官不幸有奇禍萬
事但求無媿心之句以自厲適六安
學正鏞出示家藏板本并詩抄一帙
板本較前寫本頗詳然脫簡尚多字
或漫滅不可讀考之晦菴先生荅仲
至書有云黃巖老過訪惠詩一篇甚
佳亦見其刊行小集冠以誠齋之詩

黃巖老蓋指翁也小集疑即蹈中所
選者夫以投贈大儒之詩得經題品
而集中不載非獨散軼為可恨而竊
重有感焉蓋自為童子時僅見翁詩
一二於他本逮今壯歲宦游中外旁
搜博訪猶未獲見其全集幸而存者
又訛缺如是嗚呼亦難矣乃於政暇

據二本之同異親自校讐重加編次
東臯子十詩仍錄集首詩抄乃東塾
漁村秋泉充菴樗巢介軒諸君所作
附載于後東臯翁之父東塾以下至
學正君皆其裔孫也學正君拳拳於
先世文獻有足尚者又四年編成凡
十卷爰謀諸太守宋侯刻而傳之以

成其志因系予所感如此俟嗣有所
得續附焉且以見台郡人物之盛戴
氏詩派之遠而讀其詩者又當論其
人及其世云

弘治戊午孟夏初吉

賜進士奉議大夫直隸廬州府同知
前刑部員外郎西充馬金汝礪父書

于郡之班政亭

西漢班固金文無父善

揚進士奉議大夫直轄蓋州府同知

府判官不盡夏時吉介所請書作

以文其世云平前之文來全以下主

內務無之委而實其體昔之當徐其

新對州員且必具各得以此之盜獲

必其去因系于所處破此對臨育放

凡物之成毀有數而斯文之顯晦有
時數與時遇而所以成而顯之則又
有賴乎其人焉耳昔昌黎韓子極力
於文詞卒棄為顏壁間物至宋得歐
陽子表而出之始克盛行而柳柳州
之文亦必待東坡稱之而後人知其
與韓顏顏夫以二公之文猶爾而况

其他乎先世石屏詩全集宋紹定間
已板行歲久湮滅而家藏本亦散逸
天順初家君恬隱先生重錄小集并
續集為一帙家兄安州守潛勉先生
檢故篋復得刻本後集第四稿下卷
并第五稿上下二卷鏞亦於藏書家
得律詩數十篇成化己亥悉付姪進

士豪携至京求完本豪復取南塘遺
翰所載東楚諸先世古律絕詩若干
篇附石屏集後將刻以傳繼而豪奉
命出叅東廣政未幾卒于官而是志竟
弗果矣鏞往典六校時每一展誦欲
付諸梓而力未能也適今郡侯西充
馬公由憲部郎出倅于廬行部按六

公暇評古今詩鏞因取以進且告之
故公亟讀三嘆曰是可以無傳乎其
責在我矣乃携歸郡齋手自類次仍
正其訛缺而復序諸其後因與前郡
侯陽城宋公謀而刻之嗚呼是集之
傳豈偶然哉顯於始晦於中而復流
布於終是雖時數之使然抑亦公好

古右文之所致也雖然公不獨於斯
文然爾為政恒先理寃滯植善類恤
窮獨皆是心也他日推是心以舉遺
逸以脩廢墜以壽

國家命脉其勲業文章將與歐蘇二
公埒而先世之詩或因公以垂永久
與韓柳二集相終始豈非幸哉豈非

幸哉

弘治甲子歲中秋日迪功郎

南京國子監監丞十世孫鏞謹識

鏞往典廬之六學承郡侯宋馬
二公重刻先世石屏詩集于郡
齋繼而宋公改慶陽鏞亦承之
國學今馬公又擢叅貴藩去鏞
懼板募累費廬民久將就淪棄
也乃進咨掌監事少宰黃先生
移檄廬郡取而歸之國學東書

樓而皮焉昔李公擇藏書於白石僧舍將以供後人無窮之求鏞今藏于是者要亦以為天下之公器而匪敢私于祖宗也凡同是心者幸相與永其傳焉
正德二年春二月清明日鏞識

蘇州與蘇州六學各藏





壬戌夏五月自都門歸世事皆淡惟此幾本破書尚有
不能釋然者故每聞坊間新收故家書彼以為無宋元舊
刻不敢送觀而余必欲觸熱到彼恣意尋覓此戴石屏
詩為瑣川吳氏舊藏余收諸西山堂者也避暑西齋日
讀一卷中詩句多有與余趣向適合者臨覽之頗為快
意其七言律中訪趙升卿一首第五六句云田園自樂
陶元亮鄉里多稱馬少游余拍案叫絕此石屏先生
為我晨鐘之覺也蓋余幼時在我二人懷抱中及有

知識即見卧房中壁厨上有一聯云我愛陶元亮
人稱馬少游今得此詩證之不啻早示我以歸宿
之地矣晚間納涼與兒子玉堂談及此事可知人生
境界于數十年前已有定著安能相強耶

右跋二通在八卷本後丙子上元家居無事重
錄于此全本上其避暑西齋之前係第一通
跋而摘錄之者避暑西齋云云後係第二通
跋而全錄之者

堯圃主人書

戴石屏詩集刻本余于壬戌夏五月始得之然止八卷石屏詩
回元具也然檢藏書家書目都云十卷余所得刻本日後確
有割補痕初不解何故往假香嚴周文藏抄本方知前有
東臯子詩後有附錄諸詩果十卷於全也因抄与刻行款不
符未註補錄所謂刻本一卷第存諸篋衍身及丁卯冬十
月得同郡蔣辛齋舊藏明刻全本遂得補八卷中欠
葉然後序第三葉黃崑巖卷云一起至末皆失之云云後
用藏抄本補其文行款未能如舊矣頃元抄觀東閣師
德言以故家藏出書數種云云二據得二種石屏詩直在
焉首尾完好唯卷第三十葉廿葉仍屬抄補聞是書二
出蔣辛齋氏或二從所本鈔是一冊刻之書至再至之而
始得全本豈不難哉豈不辛哉丹書之直撥回香案以
是將本与同實俾得他姓以淑其直云 甲戌四月 鴻為